

qu. sier Bortolamio, debitor de la Signoria dil dazio di come caratador, qual fu messo di anni 16, domanda di gratia de pagar de imprestedi etc.

Et per li Consieri, fu posto che al prefato li sia concesso di poter domandar gratia con li Consegli; et fu presa.

Fu fato scurtinio di uno Savio dil Consejo. Rimase sier Marco Minio stato altre fiate, qual è orator a Roma. Et uno savio a Terra ferma, sier Tomà Mocenigo, fo capitano a Vicenza, di sier Lunardo fo dil Serenissimo, qual vene a tante e tante con sier Lorenzo Dandolo, è de la Zonta, qu. sier Antonio dottor; e rebalotadi tutti do, rimase di una balota, fo chiamà a sentar e intrò *immediate*.

Fu poi tolto el scurtinio, con boletini di tre sopra la materia dil Cao di Vacha. Tolti numero 9, rimase quelli sarano segnati con la † davanti, posto el scurtinio qui soto.

Fu posto, per li Consieri, Cai di XL e Savii, che a sier Iacomo da Mosto, electo castelan a Napoli di Romania, sia scritto in Candia li debbi dar ducati 200 di sovenzion, come ad altri è stà consueto, et fu presa. Ave 163 de sì, 10 di no.

Fu posto, per li Savii ai ordeni: che il Capitano de le galie di Fiandra sia confinato in galia per tutto 12 di questo, et partir a di 15, et le do altre galie poi zorni 4 *ut in parte*, sotto pena di ducati 500 da esserli tolti per li Avogadori di Comun, senza altro Consejo, oltra tutte le altre pene dil suo incanto: ave 2 di no, et fu presa, 156 di sì, 2 di no.

Fu volesto meter per i Consieri e Cai di XL, elezer quelli 6 sora li cotimi justa el consueto, et li Cai di XL, dieno intrar a la bancha questo Avosto, andono dal Doxe e Signoria dicendo toca tal voxe a loro; sichè nulla messeno.

Fu posto, per sier Zuan Miani el consier, atento dil 1512 a li 25 Octobre, fu per questo Consejo dato provision di ducati 100 a l'anno a Martin di Salerno servitor dil signor Renzo da Cere, per operation fece a l'aquisto di Crema, et atento poi quando sguizari col Cristianissimo re erano per
257* combater el signor Renzo parti da Crema e andò via *etiam* ditto Martin lo seguitoe, però, non havendo da quel tempo in qua avute dite provisione, sia preso che più non habbi tal provision, dal zorno si parti di Crema, a exemplo di tutti.

Et sier Antonio Condolmer savio a Terra ferma andò in renga, justificò el Colegio qual avea scritto una letera a Padoa la ge fusse pagada, et per dilo Consier suspesa. Narò el modo li fo dato

tal provision, perchè mediante lui Crema vene soto la Signoria nostra, e fu preso darli ducati 200 contadi, vestirlo, e la provision è senza alcun cargo. Et volendo narar quello havia facto, non la sapendo ben, sier Andrea Griti procurator savio dil Consejo se levò e narò el tutto. Fo lecto la parte dil 1512, et il Miani non li andò a risponder, e li Savi messeno star sul preso, *videlicet* la provisione li cora. Andono le parte: 116 di Savii, 53 dil Miani, 3 non sincere, una di no.

Fu posto, et fo l'ultima parte in la materia di le cenere, per sier Andrea di Prioli savio sora la merchadantia, absente sier Piero Zen: che ditte cenere di Ponente non potesseno venir con altro che con nave e galie nostre: *ut in parte*. A l'incontro, sier Marin da Molin e sier Tomà Mocenigo savii sora la merchadantia, messeno le venisse con ogni navilio, e niun messe pagasseno nulla. Andò le do parte: 2 non sincere, 2 di no, 53 dil Prioli, 111 dil Molin e Mocenigo, et questa fu presa.

Scurtinio di uno Savio dil Consejo.

3	Sier Alvise Gradenigo, fo Cao dil Consejo di X, qu. sier Domenego el cavalier	80.115
2 †	Sier Marco Minio, fo savio dil Consejo qu. sier Bortolamio	100. 98
4	Sier Zuan Badoer dottor et cavalier, fo ambador in Franza	54.139
7	Sier Hironimo Zustignan el procurator	84.111
1	Sier Zuan Trivixan, fo consier, qu. sier Zacharia dottor, cavalier	44.147
6	Sier Daniel Renier, fo capitano a Verona, qu. sier Constantin	82.117
9	Sier Antonio Condolmer, è savio a Terra ferma, qu. sier Bernardo	80.152
8	Sier Gasparo Malipiero, el Cao dil Consejo di X, qu. sier Michiel	62.133
5	Sier Hironimo da cha' da Pexaro, fo capitano a Padoa, qu. sier Benedetto procurator	93. 97
10	Sier Bortolamio Contarini, fo consier, qu. sier Polo	47.141

Scurtinio di uno Savio di Terra ferma.

Sier Nicolò Salamon, fo avogador di Comun, di sier Michiel el cavalier	91.103
--	--------